

■ LESCHA DA SEGUNDAS ABITAZIUNS

Ademplì impurtants postulats en ils sbozs

(anr) L'Associaziun da las vischnancas svizas ha prendì posiziun pertutgant la lescha da segundas abitaziuns ed il regulativ correspondent. Ella è stada represchentada en las duas gruppas che han elavurà ils sbozs. En general è l'associaziun numnada cuntenta cun il resultat, era sch'igl è vegnì creà – cun acceptar l'iniziativa – ina nova stipulaziun constituziunala. Quella stat en concorrenza cun il dretg sin possess ch'è medemamain francà en la constituziun federala. L'associaziun da las vischnancas beneventa che segundas abitaziuns, economisadas turisticamain, pon vegnir construidas vinavant e che bagetgs da muntada per la fatscha dal vitg pon vegnir midads en segundas abitaziuns. Impurtant è per l'Associaziun ch'il possess vegnia garantì.

Tenor il sboz elavurà pon abitaziuns – eregidas segund il vegl dretg – vegnir midadas da tut temp en segundas abitaziuns e viceversa. L'associaziun refusa la varianta

cumplettanta che na dat naginas pussaivladads dad engrondir. Tenor sia opiniun stoi esser pussaivel da pudair bajegiar en ina emprima abitaziun tenor il dretg vegl ulteriuras abitaziuns entaifer il volumen existent. L'associaziun pretenda plinavant ch'i saja era cler co abitaziuns sajan da tractar ch'èn vegnidas lubidas legalmain tranter ils 11 da mars ed ils 31 da december 2012. En il dretg per segundas abitaziuns sto vegnir francà cleramain che questas lubientschas sajan legalas e na possian betg vegnir contestadas posteriuramain.

Ord vista da l'associaziun èsi plinavant impurtant che la vigur da la lescha da segundas abitaziuns saja dad intercurir reguladamain areguard svilup economic e spazial en ils territoris pertutgads. Quellas retschertgas ston esser la basa per giuditgar ulteriuras mesiras flancantas ed uschia eventualmain pudair far adattaziuns da la lescha da segundas abitaziuns, resp. da l'ordinaziun correspondent.